

Visoki predstavnik i Specijalni predstavnik Evropske unije istakao sve veću ulogu Evropske unije u BiH

Visoki predstavnik i Specijalni predstavnik Evropske unije (*High Representative and European Union Special Representative* – HR/EUSR), Paddy Ashdown, u svom jutrošnjem obraćanju policajcima u Sarajevu, istakao je sve veću ulogu Evropske unije u BiH, rekavši da je Policijska misija Evropske unije (*EU Police Mission* – EUPM) opipljiv dokaz važnosti koju Evropska unija pridaje stabilnosti jugoistočne Evrope i većoj povezanosti sa zemljama ove regije. “Evropska unija je pokazala da ona nema strategiju povlačenja za Balkan, nego strategiju ulaska, koja treba da završi članstvom u Evropskoj uniji,” rekao je HR/EUSR visokim zvaničnicima policijskih snaga u BiH i EUPM.

On je kazao da angažman EUPM pokazuje da BiH “prolazi kroz značajnu fazu, pri čemu njen status post-konfliktne zemlje prelazi u status zemlje koja treba da se pridruži Evropskoj uniji. Ukoliko BiH želi ići dalje ovim putem, onda je uspostavljanje vladavine zakona od ključne važnosti. Rad policije u Bosni i Hercegovini bavi se osnovnim problemima ove zemlje. Bez profesionalne domaće policije, koja štiti građane bez obzira na njihovu etničku pripadnost, ne može biti trajnog mira i trajnog pomirenja.”

EUPM će nastaviti rad koji je započeo UN IPTF, iako je njegov mandat drugačiji. EUPM ima manje osoblja, koje će biti rapoređeno zajedno sa domaćom policijom. Oni više neće biti odgovorni za osnovnu obuku i izdavanje dozvola za rad. Njihov

mandat je da se usredotoče na strateške izazove sa kojima se policija u BiH suočava. EUPM neće obavljati policijske dužnosti u BiH; ona će nastojati da pomogne policijskim snagama u BiH da svoje dužnosti obavljaju profesionalnije i efikasnije. EUPM će se osobito koncentrirati na dva strateška prioriteta, a to je da pomogne policiji da garantira bezbjednost povratnika te da riješi problem organiziranog kriminala. "Ovo je veliki korak za BiH, koja će sve više sama obavljati zadatke, umjesto da ih drugi obavljaju za nju," rekao je visoki predstavnik.

HR/EUSR je ponovio prioritete koje je ustanovio kada je preuzeo svoju dužnost – najprije pravda, potom radna mjesta, putem reformi. "Ukoliko želimo da rad na ovome bude uspješan, potrebno je provesti reformu cjelokupnog sistema krivičnog prava," rekao je. "Policijske snage BiH moraju osigurati pravdu, ali one to ne mogu učiniti same. Iz tog razloga provodi se restrukturiranje sudova, reforma pravosuđa te se uspostavlja Državni sud sa specijalnim vijećem koje će se baviti kompleksnim slučajevima organiziranog kriminala. Na taj način, kada vi, policajci, budete hapsili kriminalce, znaćete da će oni uistinu doći pred lice pravde.

HR/EUSR je čestitao i evropskoj i bosanskohercegovačkoj policiji za dobar početak rada Policijske misije Evropske unije, čime je osiguran nesmetan prelazak ovih zadataka iz ruku UN/IPTF u ruke EUPM.